



JOSU SANTESTEBAN

Bargotako Biurko Gorri upeltegiko mahastia. Fernando Llorens jabeak kalitate oneko mahatsa espero du.

Zerura begira

BI UPELTEGIREN KASUA. Bargotako Biurko Gorri eta Oioneko Faustino upeltegiek aurtengo uzta nola ikusten duten azaldu dute

R. Goenaga | DONOSTIA

Bargotako (Nafarroa) Biurko Gorri upelategia eta Oiongo (Araba) Faustino bata bestearengandik hurbil aurkitzen dira, bi herrialdeen arteko mugen alde banatara baitaude. Biak egunotan zerura begira bizi dira.

Biurko Gorri familiarteko upelategi txikia da, lau anaien eta beste bi lagunaren artean daukatena. Bertan 15-20 lagun inguruk lan egiten dute. Errioxako Jatorri Izena duen ardoa ekoizten duten Nafarroako bederatzi upelategietako bat da. Mahatsaren ekoizpen ekologikoa egiten dute, eta ardoa egiteko erabiltzen duten mahatsaren zati handi bat erosi egiten dute, 25 hektarea lur besterik ez baitute.

Eguraldia dela eta, batzuen ustez, uztaren beherakada %30-40 artean izango dela esan

du upeltegiko jabe Fernando Llorensek. Hala ere, bere iritziz, gehiegizko uzta arazoa izan ohi da. Izan ere, kasu horretan, mahatsaren kalitateak behera egiten du eta, beraz, ardoarenak ere bai.

Haiek, haatik, mahastiak leku menditsuetan dituzte. «Hezetasunak leku altuetan arazo gutxiago eragiten ditu, ureztatzen diren lurretan edota Ebro ibai ertzekoetan baino. Horregatik kalitate handiko mahatsa espero dugu, azken egunotako eguraldiaren laguntzaz, noski».

Faustino upelategia, berriz, upelategi handia da, Faustino Taldeko hiru upelategietako bat. Arabako Errioxa Jatorrizko Izena duen ardoa egiten dute. Mahatsa eurek ekoizten dute, dituzten 560 lur hektareatan.

Faustino upelategien kasuan, Jose Luis Fernandez arduradunarekin jardun da EGUNKARIA.

Uztak, %10-15eko jaitsiera izango duela espero du Fernandezek. Hala ere, egun mahatsaren egoera «ezinhobea» dela adierazi du, «euria egiteko arriskua kontuan izanik».

Faustinon 3 milioi kilo inguruko ekoizpena iragarri dute. Bertan, *tempranillo* motako mahatsa da nagusi. Hala ere, cava egiteko mahatsak (*biura* eta *chardonet*), ardo zurirako mahatsak, eta beltza egiteko *graziano* eta *mazuelo* motakoak ere badituzte.

Bi upelategietan ados agertu dira aurten ez dela eguraldi onik izan adieraztean, eta uztaren bilketa atzeratu egin dela baieztatu dute. Mahats zuriak jasotzen hasiko dira lehenengo, eta ondoren, beltzak. Eguzkiaren laguntza beharko dute, bada, euskal upeltegiek, uzta on bat izateko. Denek eskertuko luke. Ziur.

LABURRAN

Eraikuntza sektoreko lan istripuak udan nabarmen ugartzen direla salatu du CCOO sindikatuak

«Eraikuntza sektorean heriotza eragiten duten istripuen zenbatekoa nabarmen hazten da udan», salatu dute CCOO sindikatuko kideek. Irregularitasun larriek heriotzarekin erlazio zuzena dutela adierazi dute. Ezaugarri errepikatuenak kontratazio eta kaleratze irregularrak, etorkinen esplotazioa eta gehiegizko azpikontratzea dira. Urteko lehenengo sei hilabeteetan EAEn hamalau lagunek bizia galdu dute eraikuntza lanean zihardutela gertatutako istripuen ondorioz.

Tchuruk bere helburua Alcatel enpresa dagoen «zulotik ateratzea» dela jakinarazi du

Serge Tchuruk Alcatel enpresako zuzendariak esandakoaren arabera, «nire helburua 2003 urtearen amaieran Alcatel konpainiak irabaziak edukitzea da». 23.000 pertsona kaleratuko dituztela azaldu berri badute ere, Alcatel «zulotik atera» daitekeela uste du Tchuruk. Beraz, euren enpresa zatikatu eta saltzeko beharrik ez dagoela dio. Gainera, adituek egindako iragarpenak ez direla beteko azaldu du. Serge Tchuruk ustez, epe luzera telekomunikazio enpresen eskaria handitu egingo da.

ENERGIA

65 herrialdetako ordezkariak Osakan bildu dira VIII. Nazioarteko Energia Foroa ospatzeko

Erredakzioa | DONOSTIA

VIII. Nazioarteko Energia Foroa ospatzeko 65 herrialdetako ordezkariak eta nazioarteko 11 erakundetako kideak bildu ziren atzo Osakan, Japonian. Ekoizle eta kontsumitzaileen arteko elkarbizitza sustatzea eta gero eta handiagoa den petrolioaren beharra nola murriztu erabakitzea dira bertara hurbildutako helburuak.

AEBeK Irak erasotzeko iragarritako asmoak, nahiz Nazioarteko Energia Agentziak (AIE) petrolio kontsumoaren hazkunde iragarri izanak, urduritasun handia eragin zuten atzoko jardunaldian. Osakan bildutako ordezkari guztiek petrolio merkatu egonkorra desio dutela jakinarazi dute. Dena den, helburu hori lortu ahal izateko finkatu beharreko prezioaren eta hartu beharreko neurrien inguruan ez dute adostasunik lortu.

Robert Priddle AIEko zuzendariak Europako Batasunak erreserbak igotzeko proposamenari buruz bat ez datorrela azaldu zuen. Priddlek iritziz, «prezioak igotzean EBko petrolio erreserbak merkaturatzen badira, merkaturatzen esku-hartze-ko egitasmo bati buruz hitz egiten ari gara. Hori eta hornidurarik ez dagoenerako egitasmo bat ez dira gauza bera», gaineratu zuen.



FONDO SOCIAL EUROPEO
EUROPAKO GIZARTE FONDOA



Bizkaiko Foru
Aldundia
Lan eta Trebakuntza
Saila

Diputación Foral
de Bizkaia
Departamento de Empleo
y Formación

Enpresa-proiektuen sustatzaileei oinarritzko trebakuntza emateko ikastaroa

Helburua

Enpresa txikien sustatzaileak trebatzea, enpresa proiektuak bideragarriagoak izan daitezen.

Edukia

- a) 200 ordutako trebakuntza teoriko-praktikoa:
 - 'Enpresa zelan sortu, Negozio plana' (76 ordu).
 - 'Enpresa berriaren kudeaketa' (124 ordu).
- b) Enpresa abiabidean jartzeko, diru-laguntza.

Hartzaileak

Enpresa-asmoak nahiz proiektuak dituztenak.

Ikastaldia

02.10.7tik, 02.12.17ra.

Ikastaroaren ordutegia

Astelehenetik ostiralera, 16:00etatik 20:00etara.

Eskaerak aurkezteko epea

2002.eko irailaren 25era arte.

Eskaera-eredua eta argibideak

Lan eta Trebakuntza Saila
Obispo Orueta, 6
48009 Bilbo
Tel.: 94 420 73 00

Foru Diputatua

Hierros Aloñak burni biltegi berria inauguratu zuen ostiral arratsean Oñatiko Zubillaga auzoan. Ekitaldian Miguel eta Pruden Indurain anaiak izan ziren Jesus Arregi lantegiko zuzendari nagusiarekin batera.

